



Adresa: **Ul. Hamdije Čemerlića 39a**
71000 Sarajevo
<http://www.voda.ba>

tel. +387 33 726 400
fax. +387 33 726 423
e – mail: info@voda.ba

Broj: **UP-1/21-3-40-210-4/24**
Datum: **31.07.2024. god**

«Agencija za vodno područje rijeke Save» Sarajevo rješavajući po zahtjevu pravnog lica «INTER» d.o.o. Tešanj za donošenje rješenja o vodnoj dozvoli za ispuštanje tehnoloških otpadnih voda u prirodni recipijent i za aktivnosti koje mogu privremeno ili trajno degradirati kvalitet voda ili ometati poboljšanje njihovog postojećeg kvaliteta u postupku rada postrojenja za proizvodnju betona izgrađenog u naselju Ljetinić, općina Tešanj, na osnovu člana 109. stav (1) tačka 2. i stav (2) tačka 1. Zakona o vodama («Službene novine Federacije BiH», broj 70/06) i člana 200. stav (1) Zakona o upravnom postupku («Službene novine Federacije BiH», broj 2/98, 48/99 i 61/22), donosi

R J E Š E N J E **o vodnoj dozvoli**

1. Pravnom licu, «INTER» d.o.o. Tešanj, daje se vodna dozvola za ispuštanje tehnoloških otpadnih voda u prirodni recipijent i za aktivnosti koje mogu privremeno ili trajno degradirati kvalitet voda ili ometati poboljšanje njihovog postojećeg kvaliteta u postupku rada postrojenja za proizvodnju betona kapaciteta 30m³/h izgrađenog u naselju Ljetinić na zemljištu označenom kao k.č. broj: 293/4 i 293/8 K.O. Ljetinić, općina Tešanj.
2. Vodna dozvola se daje na osnovu dostavljene dokumentacije, utvrđenog činjeničnog stanja tokom uviđaja izvršenog na predmetnoj lokaciji i uz sljedeće uslove:
 - 2.1. Da se upotreba i korištenje instalirane opreme i objekata na predmetnom postrojenju za proizvodnju betona vrši u skladu sa njihovom prirodom i namjenom te u skladu sa dostavljenom dokumentacijom i uslovima iz ove vodne dozvole.
 - 2.2. Da se, za vrijeme trajanja ove dozvole, obezbijedi da se tehnološke otpadne vode nastale u proizvodnom postupku spravljanja i proizvodnje betona, pranjem vozila za transport betona i tehnološke opreme nesmetano prikupljaju u taložniku br 1, nakon taloženja iste vraćaju u sistem recirkulacije a višak vode zajedno sa oborinskim vodama sa radno manipulativnih površina, prikupljenim putem kanala sa slivnim rešetkama, nesmetano odvođe do taložnika br 2 a potom na tretman u separator ulja i masti. Prečišćene vode iz ovog taložnika se, preko okna za monitoring, ispuštaju u rijeku Usoru.
 - 2.3. Objekte koji se koriste u svrhu prikupljanja, odvodnje i tretmana tehnoloških i oborinskih onečišćenih otpadnih voda nastalih na predmetnom lokalitetu (kanalizaciona mreža, slivne rešetke, betonski taložni bazeni, separator ulja i masti...) potrebno je održavati i koristiti na takav način koji će obezbijediti njihovu potpunu ispravnost i funkcionalnost. O načinu i vremenu radova održavanja neophodno je voditi službenu evidenciju i arhivu.
 - 2.4. Prečišćene otpadne vode, prije ispuštanja u recipijent – rijeka Usora, moraju ostati u maksimalno dopuštenim granicama definisanim u Prilogu 27. Uredbe o uslovima ispuštanja otpadnih voda u okoliš i sisteme javne kanalizacije («Službene novine Federacije BiH», broj 26/20, 96/20 i 1/24).
 - 2.5. Čišćenje i održavanje taložnika i separatora ulja i masti te skladištenje i konačno zbrinjavanje otpada može vršiti isključivo firma ovlaštena za tu vrstu djelatnosti, prema posebnom ugovoru. Korisnik je obavezan da redovno vodi dnevnik o pražnjenju i odvozu mulja/taloga iz taložnika i separatora ulja i masti kao i preuzimanje drugog otpada.
 - 2.6. Sadržaj (mulj) iz taložnika i separatora ulja i masti se ne smije ni privremeno odlagati na česticu «vodno dobro», odnosno u vodotok i na njegove obale.
 - 2.7. Da se, za vrijeme trajanja ove dozvole, oko nadzemnog rezervoara za smještaj goriva za internu upotrebu izvede zaštitna nepropusna tankvana. Zapremina tankvane mora biti tako proračunata da prihvati kompletnu količinu goriva iz rezervoara.
 - 2.8. Da se, u skladu sa propisima iz oblasti zaštite okoliša, vrši bezbjedno skladištenje i postupanje sa opasnim materijama i otpadom nastalim na predmetnom lokalitetu (adekvatnim mjerama onemogućiti bilo kakvo isticanje i rasipanje opasnih i štetnih materija na tlo i u vode).
 - 2.9. Da se obezbijedi siguran način skladištenja ulja i maziva u natkrivenoj, namjenski izgrađenoj prostoriji sa podnom pločom izvedenom od vodonepropusnog betona otpornog na dejstva hemikalija.

- 2.10. Da se istrošena ulja, nauljene krpe i sav opasni otpad koji nastaje na prostoru postrojenja za proizvodnju betona i betonske smjese redovno prikuplja i propisno, privremeno skladišti u metalne spremnike do krajnjeg, ekološki prihvatljivog zbrinjavanja od strane ovlaštene organizacije, a prema sačinjenom ugovoru.
 - 2.11. U blizini prostora gdje je postavljen nadzemni rezervoar (za smještaj goriva za internu upotrebu), osigurati priručna sredstva za brzu intervenciju u slučaju nekontrolisanog istjecanja, kako bi se spriječilo moguće onečišćenje voda i tla (piljevina, prikladni absorbensi, odgovarajuće posude, uređaji za pretakanje i sl.).
 - 2.12. Vlasnik odnosno korisnik poslovnog objekta je dužan, putem laboratorije ovlaštene od strane Federalnog ministarstva poljoprivrede, vodoprivrede i šumarstva, vršiti redovna ispitivanja kvaliteta otpadnih voda, uzimanjem uzorka efluenta iz okna za monitoring u skladu sa Uredbom o uslovima ispuštanja otpadnih voda u okoliš i sisteme javne kanalizacije. Učestalost i način ispitivanja vršiti u skladu sa članom 20. Uredbe o uslovima ispuštanja otpadnih voda u okoliš i sisteme javne kanalizacije. Rezultate analiza dostaviti ovoj Agenciji.
Izveštaje o ispitivanju i ocjeni kvaliteta otpadnih voda može uraditi isključivo laboratorija ovlaštena od strane Federalnog ministarstva poljoprivrede, vodoprivrede i šumarstva po osnovu člana 64. stav (3) Zakona o vodama i Pravilnika o uslovima koje moraju ispunjavati referentne odnosno ovlaštene laboratorije za ispitivanje voda, sadržaj i način davanja ovlasti («Službene novine Federacije BiH», broj 14/10, 14/13, 26/14, 23/17 i 41/20).
 - 2.13. Vlasnik odnosno korisnik objekta je obavezan pridržavati se svih mjera i uslova propisanih u saglasnostima i dozvolama izdatim od strane drugih nadležnih organa, a odnose se na korištenje i zaštitu voda i nisu u suprotnosti sa uslovima iz ove vodne dozvole.
3. Vlasnik, odnosno korisnik poslovnog objekta je obavezan voditi propisne evidencije, te nadležnim organima dostavljati propisane obrasce (Obrazac EBS) u skladu sa Zakonom o vodama i Pravilnikom o načinu obračunavanja, postupku i rokovima za obračunavanje i plaćanje i kontrolu izmirivanja obaveza na osnovu opšte vodne naknade i posebnih vodnih naknada («Službene novine Federacije BiH», broj 92/07, 46/09, 79/11, 88/12 i 03/16), Prilog 1. Poglavlje V – Određivanje koeficijenata zagađenja za zagađivače voda kod kojih se ne vrše direktna mjerenja voda te prema dostavljenim obrascima izvršavati u cjelosti i u propisanim rokovima obavezu plaćanja vodnih naknada.
 4. U periodu važenja ove dozvole, Korisnik je dužan provoditi sve mjere i aktivnosti propisane istom.
 5. U slučaju izvanrednih situacija, havarijskih onečišćenja i drugih sličnih okolnosti, čime bi bio ugrožen kvalitet podzemnih i površinskih voda, vlasnik odnosno korisnik predmetnog poslovnog objekta obavezan je izvijestiti nadležne organe i izvršiti izvanredna postupanja po nalogu nadležnih organa, te o vlastitom trošku uzroke štete otkloniti, a nastale štete nadoknaditi.
 6. Ukoliko usljed štetnog djelovanja voda nastalog zbog neizgrađenosti ili nedovoljne osposobljenosti (zaštitnih) vodnih objekata dođe do nastanka štete na lokalitetu predmetnog poslovnog objekta obuhvaćenog ovom vodnom dozvolom, korisnik zaštitnih vodnih objekata nije odgovoran za nastale štete.
 7. Ukoliko radom predmetnog poslovnog objekta za koji se izdaje ova vodna dozvola dođe do promjene režima površinskih i podzemnih voda, a te promjene prouzrokuju štete ma kakvog kakvog karaktera, korisnik objekta je dužan uzroke nastalih šteta otkloniti, a nastale štete trećim licima nadoknaditi.
 8. Prava stečena po ovoj dozvoli ne mogu se prenositi na treća lica, a ista prestaju u skladu sa odredbama Zakona o vodama.
 9. U ovoj upravnoj stvari plaćene su sve upravne pristojbe.
 10. Ova vodna dozvola, shodno članu 117. stav (1) i 129. Zakona o vodama se daje sa rokom važenja od 5 (pet) godina od dana pravosnažnosti ovog rješenja.
 11. Prije isteka važnosti ove dozvole Korisnik je dužan da podnese zahtjev za izdavanje nove vodne dozvole.
 12. Ovo rješenje o vodnoj dozvoli može se izmijeniti ukoliko za to nastupe razlozi utvrđeni u članu 130. stav (1) tačka 1., 2., 3. ili 4. Zakona o vodama, a zainteresirane stranke podnesu argumentiran zahtjev za izmjenu ovog vodnog akta.

O b r a z l o ž e n j e

Od strane pravnog lica «INTER» d.o.o. Tešanj, dana 23.04.2024. godine podnesen je ovoj Agenciji zahtjev za izdavanje vodne dozvole za ispuštanje tehnoloških otpadnih voda u prirodni recipijent i za aktivnosti koje mogu privremeno ili trajno degradirati kvalitet voda ili ometati poboljšanje njihovog postojećeg kvaliteta u postupku rada postrojenja za proizvodnju betona izgrađenog u naselju Ljetinić, na zemljištu označenom kao k.č. broj: 293/4 i 293/8 K.O. Ljetinić, općina Tešanj.

U provedenom postupku, uz zahtjev za izdavanje vodne dozvole dostavljena je i pregledana sljedeća dokumentacija:

- Ovjerena kopija Rješenja o izmjenama podataka u sudski registar broj: 043-0-Reg-19-001073 izdatog dana 07.10.2019. godine od strane Općinskog suda u Zenici,
- Ovjerena kopija Uvjerjenja o registraciji poreznog obveznika izdatog dana 15.10.2019. godine od strane Porezne uprave Federacije BiH-Kantonalni porezni ured Zenica,
- Kopija Rješenja o odobrenju za upotrebu građevine broj: 12-23-1433/19 izdatog dana 30.05.2019. godine od strane Ministarstva za prostorno uređenje, promet i komunikacije i zaštitu okoline Zeničko-dobojskog kantona,
- Kopija Rješenja o vodnoj dozvoli broj: UP-I/25-3-40-145-4/19 izdatog dana 15.05.2019. godine od strane «Agencije za vodno područje rijeke Save» Sarajevo,
- Kopija Rješenja o ukidanju Rješenja o prethodnoj vodnoj saglasnosti broj: 05-25-03337-3/17 i kopija Zaključka o odbacivanju zahtjeva za vodnom saglasnošću broj: 05-25-00185-1/18 izdatih dana 26.02.2018. godine od strane Ministarstva za poljoprivredu, šumarstvo i vodoprivredu Zeničko-dobojskog kantona,
- Glavni projekat - vanjske hidroinstalacije: Postrojenje za proizvodnju betona u naselju Ljetinić, općina Tešanj, urađen od strane «IBIS» d.o.o. Zavidovići, broj: 69-IB-G/17, novembar 2017. godine, te revidovan od strane «Zavod za izgradnju» a.d. Banja Luka (broj:10-82-12/17, decembar 2017. godine) - na uvid,
- Projekat izvedenog stanja urađen od strane «INPROS» d.o.o. Mostar (broj: VIK 01-01/19, januar 2019. godine) - na uvid,
- Kopija Ugovora o čišćenju separatora, odvozu otpadnog mulja i taloga, zauljenog mulja, rabljenog ulja i emulzionih tečnosti zaključenog sa «EKO-SERVIS» d.o.o. Tešanj,
- Kopije Izvještaja o monitoringu kvaliteta i kvantiteta otpadnih voda broj: 986/23, juni 2023. godine i broj: 1796/23, decembar 2023. godine urađeni od strane «Inspekt-RGH» d.o.o. Sarajevo,
- Dokaz o uplaćenju upravnoj taksi.

Nakon izvršenog uvida u dostavljeni zahtjev i priloženu dokumentaciju utvrđeno je da su uz zahtjev dostavljeni potrebni prilozi, te je ovaj organ u skladu sa odredbama Zakona o upravnom postupku pokrenuo postupak u ovoj upravnoj stvari.

U skladu sa članom 12. stav (5) i (6) Pravilnika o sadržaju, obliku, uslovima, načinu izdavanja i čuvanja vodnih akata («Službene novine Federacije BiH», broj: 31/15, 55/19, 41/20 i 63/22), izvršen je obilazak predmetnog poslovnog objekta u naselju Ljetinić, općina Tešanj i tom prilikom je sačinjen Zapisnik o uviđaju broj: UP-1/21-3-40-210-2/24 od 11.07.2024. godine.

Na osnovu dostavljene dokumentacije i izvršenog uviđaja na licu mjesta utvrđeno je sljedeće:

Lokacija na kojoj je izgrađeno postrojenje za proizvodnju betona se nalazi na desnoj obali rijeke Usore u naselju Ljetinić, općina Tešanj. Kapacitet postrojenja je 30 m³/h betona. Postrojenje čine sljedeće cjeline: mješalica, silosi za cement, skladište, radionica sa garderobom i sanitarnim čvorom, taložnici, trakasti transporter, trafostanica, privremeno skladište za agregat, rezervoar za aditive, kompresor, rezervoar za vodu, nadzemni rezervoar za gorivo (za internu upotrebu), separator ulja i masti (kapacitet 10 l/sec), septička jama.

Snabdijevanje vodom za sanitarne i dio tehnoloških potreba riješeno je priključkom na vodovodnu mrežu MZ Žabljak a za tehnološke potrebe voda se obezbjeđuje iz bunara odakle se dovodi do rezervoara za tehnološku vodu. Sanitarno-fekalne otpadne vode se prikupljaju zasebnim sistemom kanalizacije i odvođe u vodonepropusnu septičku bez preliva za što je od strane nadležnog Ministarstva za poljoprivredu, šumarstvo i vodoprivredu Zeničko-dobojskog kantona izdat akt.

Skladištenje goriva za vlastite potrebe vrši se u nadzemnom čeličnom rezervoaru bez zaštitne tankvane smještenom uz objekat radionice. Na mjestu pretakanja postavljene su čelične posude za prihvatanje eventualno rasutog goriva.

Tehnološke otpadne vode opterećene supendovanim materijama, ostacima cementa i agregata nastale u radnoj zoni betonare u postupku spravljanja betona, pranjem vozila za transport betona i spiranjem radnih površina se prikupljaju u taložniku br 1 a nakon taloženja, iste su u sistemu recirkulacije. Višak vode iz ovog taložnika se zajedno sa onečišćenim oborinskim vodama sa manipulativnih i radnih površina prikupljenim kanizacionim sistemom sa linijskim slivnim rešetkama upušta u taložnik br 2 a potom odvođe na tretman u separator masti i ulja. Prečišćene vode se preko okna za monitoring, ispuštaju u rijeku Usoru.

Monitoring otpadnih voda se vrši redovno. Na uvid predložen izvještaj o ispitivanju kvaliteta otpadnih voda za juni i decembar 2023. godine urađen od strane «Inspekt RGH» d.o.o. Sarajevo. Prema podacima iz dostavljenih Izvještaja utvrđeno je da ispitivani parametri zadovoljavaju granične vrijednosti emisije utvrđene Uredbom o uslovima ispuštanja otpadnih voda u prirodne recipijente i sisteme javne kanalizacije.

Na osnovu dostavljene dokumentacije i uviđaja izvršenog na predmetnoj lokaciji, a u svrhu smanjenja negativnih uticaja predmetnog objekta i aktivnosti na stanje voda i vodni režim, podnosiocu zahtjeva su ovom vodnom dozvolom u tački 2. dispozitiva Rješenja propisani uslovi kojih se dužan pridržavati prilikom korištenja

predmetnog poslovnog objekta u skladu sa odredbama člana 53. i 116. Zakona o vodama, člana 12. i 13. Pravilnika o sadržaju, obliku, uslovima, načinu izdavanja i čuvanja vodnih akata i odredbama člana 3. tačka s) Uredbe o uslovima ispuštanja otpadnih voda u okoliš i sisteme javne kanalizacije.

Tačka 3. dispozitiva rješenja je propisana u skladu sa tačkama 12. i 35. Pravilnika o načinu obračunavanja, postupku i rokovima za obračunavanje i plaćanje i kontrolu izmirivanja obaveza na osnovu opšte i posebnih vodnih naknada («Službene novine Federacije BiH», broj 92/07, 46/09, 79/11 i 88/12) i Odlukom o visini posebnih vodnih naknada («Službene novine Federacije BiH», broj 46/07).

U skladu sa članom 61. Zakona o vodama i odredbama Pravilnika o postupcima i mjerama u slučajevima akcidenta na vodama i obalnom vodnom zemljištu («Službene novine Federacije BiH», broj 71/09 i 102/18) korisniku predmetnog pogona utvrđene su obaveze u tački 5. dispozitiva ovog Rješenja.

Na osnovu provedenog postupka konstatuje se da je podnosilac zahtjeva, «INTER» d.o.o. Tešanj, ispunio minimum uslova za izdavanje vodne dozvole za ispuštanje tehnoloških otpadnih voda u prirodni recipijent i za aktivnosti koje mogu privremeno ili trajno degradirati kvalitet voda ili ometati poboljšanje njihovog postojećeg kvaliteta u postupku rada postrojenja za proizvodnju betona izgrađenog u naselju Ljetinić, općina Tešanj, te je riješeno kao u dispozitivu ovog Rješenja.

Podnosilac zahtjeva je uplatio i posebne troškove shodno Zaključku ove Agencije broj: UP-1/21-3-40-210-2/24 od 08.07.2024. godine.

Podnosilac zahtjeva je uplatio upravnu taksu u iznosu od 70 KM u skladu sa Zakonom o izmjenama i dopunama zakona o federalnim upravnim taksama i tarifi federalnih upravnih taksi («Službene novine Federacije BiH», broj 06/98, 8/00, 45/10 i 43/13).

Uputa o pravnom lijeku:

Protiv ovog Rješenja može se uložiti žalba Federalnom ministarstvu poljoprivrede, vodoprivrede i šumarstva u roku od petnaest dana od dana prijema Rješenja.

Žalba se predaje ovom organu neposredno ili preporučeno poštom. Žalba se taksira sa 15 KM administrativne takse prema tarifnom broju 3. Tarife federalnih administrativnih taksi.

Obradivač akta:

Nermina Hodžić, dipl.ing.građ.

Po ovlaštenju —
Rukovodilac Sektora za izdavanje vodnih akata



Nihad Pezo, dipl.ing.građ.

Dostaviti:

- «INTER» d.o.o. Tešanj
- Ljetinić br 42, 74266 Tešanj
- AVP Sava, ISV – Vodna knjiga
- Sektor 50
- Sektor 40 - arhiva
- Oglasna ploča - AVP Sava